

第五版

大清光緒新法令

第十五冊

大清新法令第九類目錄

司法

變通現行律例

刑部議覆護理晉撫趙奏請各省通設罪犯習藝所摺

法部咨各省申明遣軍流犯到配收所習藝定章文

修訂法律大臣奏請先將例內應刪各條分次開單進呈摺并清單

修訂法律大臣奏請變通現行律例內重法數端摺

刑部奏變通竊盜條款摺

刑部奏婦女犯罪收贖銀數太微不足以資警戒擬請酌量變通摺

理藩院刑部會奏議覆改減蒙古刑律摺

修訂法律大臣奏輕罪禁用刑訊笞杖改爲罰金請申明新章摺

刑部奏擬請將州縣自理刑名案內笞杖改爲罰金一項酌提解部摺

刑部奏核議恤相驗條奏摺

刑部奏斬絞人犯無論監候立決俱應按照正例議擬摺

刑部都察院會奏議覆虛擬死罪改爲流徒摺

頁數

一

六

七

五四

五六

五七

五八

五九

六〇

六〇

六一

六二

法部奏秋審應入可矜人犯酌擬援照戲誤擅殺新章隨案分別減等摺

六四

法部奏嗣後計贓科罪之案應照時價估值摺

六七

修訂法律大臣奏遵議滿漢通行刑律摺附片二並清單

七〇

度支部奏議覆修訂法律大臣沈等奏變通旗民交產舊制摺

七一

法部奏變通秋審緩決人犯辦法摺并清單

八五

大理院奏沒官贓物擬請撥充恤囚經費摺

八六

法部奏酌核御史俾壽奏請停止刑訊摺

八八

法部咨覆川督并通行各省秋審辦法文

八八

法部奏議覆庫倫辦事大臣奏擬輕罪人犯變通辦理摺

九〇

法部奏議覆御史王履康奏請禁革官媒改設婦女待質所摺

九一

專律

刑部議覆私鑄銀圓偽造紙幣治罪摺

九二

刑部奏嚴定偽造郵票並冒用舊票等治罪章程摺

九三

修訂法律大臣奏偽造外國銀幣擬請設立治罪專條摺

九五

刑部議覆偽造外國銀圓科罪宜有區別摺

九六

九七

法部會奏議覆蘇撫奏請定販賣嗎啡等治罪專條摺

九八

司法權限

法部奏酌擬司法權限摺並清單

一〇

大理院奏謹就司法權限酌加釐訂摺並清單

一〇一

法部大理院會奏遵旨和衷妥議部院權限摺并清單

一〇四

審判

大理院奏審判權限釐定辦法摺

一〇四

大理院審判編制法

一〇六

法部等會奏京師各級審判由部試辦訴訟狀紙摺并單

一〇九

法部奏酌擬各級審判廳試辦章程摺并章程

一一一

法部奏宗室訴訟仍由大理院裁判片

一二〇

法部奏審判尋常公錯援案寬免片

一二〇

大理院稽察票傳人證出入章程

一二〇

司法警察

法部等奏定司法警察職務章程

一二一

附法部等奏定營翼地方辦事章程

一二三

大清新法
補遺

法部奏戲誤殺及可矜人犯擬請追繳埋銀摺

一二四

大清新法令第九類

司法

變通現行律例

刑部議覆護理晉撫趙奏請各省通設罪犯習藝所摺

光緒二十八年十一月十五日護理山西巡撫趙爾巽奏請各省通設罪犯習藝所一摺 硃批刑部核議具奏片併發欽此欽遵抄出到部臣等查閱原奏內稱軍流徒等犯罪名本意全失流弊滋多有不得不亟請釐定者查定例軍流各犯實係貧窮又無手藝初到配所按該犯本身及妻室子女每名日照孤貧給與口糧自到配日起以一年爲止於各州縣存儲倉穀項下動用報銷各州縣有駙遞之處一切應用人夫酌派軍流中少壯無資財手藝人犯充當給與應得工食無駙遞之州縣公用夫役均令一體充當逐日給與工價又徒犯不拘有駙無駙均勻酌配各等語詳繹例意是軍流各犯原有應當之差應供之役並非令其坐成游手無業可營今祇重看守之科條嚴逃亡之處分州縣懼管束之不密豈肯令充駙差該各犯既無役可充復何從給予工價此失本意者一也又徒罪仿於周之圜土漢之城旦流則本宥衆投裔之文軍則原補兵贖咎之意今則徒罪並不執役流犯均有定配省分儘有優於故土樂於本邦已非

徒邊之意軍自衛所裁汰雖多煙瘴諸條更無執戟荷戈之事卽實力安置亦不過爲地方添一罪人爲州縣增一罣累而於懲惡省愆之法殊無所裨此失本意者二也往昔界限嚴明道途遼遠戶籍清楚逃人無從插足故近者追蹤卽得遠者海捕無遺不必多爲之備自不慮有逃亡之犯所以軍流徒之法可行今則海禁大開輪船火車交通四達游民貧丐隨處溷迹徒以舊法繩之循例追捕卽同銷案此失本意者三也三失之外又有四弊民僞日滋犯法日衆各省軍流徒及發遣各犯逐漸增多凡在衝途州縣每歲經過不下數百起一獄之成並護解各費計之耗於公利者歲費遂成鉅款卽爲州縣虧累之大宗多糜一分無益之款卽少辦一分有益之事此一弊也軍流各犯現在上無差役可供下無工藝可供又無看管之地工食之資因之潛逃之案層見迭出緝獲之犯什無二三該各犯或罪由誤蹈或本非善良議配之初未始無悔過畏罪之心自定爰書正名之曰徒流充軍復經歷各地監卡所見所聞無非囚繫廉恥漸喪悔懼全無不爲坦然忘自作之辜更有自命爲官人之勢纔登隸籍卽仰食於縣官一著赭衣便稱雄於亡命一旦遊遁還鄉益得彰其兇橫罔知畏憚鄰里畏其報復而不發舉豪滑引爲黨援而生事端劣書蠹吏與之狼狽而不肯查緝甚至聚衆之匪倡亂之民每出於此此又一弊也軍流各犯其安於配所幸不逃者州縣以其素習兇頑難於驅役或任開押自己或靠商鋪攤供遇有賽會婚喪該各犯更以身係罪囚恣意

需索徒長兇暴之風絕無悔改之望甚至串通盜賊倚爲囊橐包庇娼賭流毒閭閻以及唆訟抗官各事亦多出其構煽昔投豺虎於四裔今以稂莠易嘉禾是因一罪人之導引更爲流徙地方添無數罪人矣此又一弊也又或孱弱之軀驟經播徙愚柔之質不慣營爲非顛踣於道路卽死亡於異鄉歸骨無望鬼其餒而朝廷本有貸死之恩該犯反無貪生之樂固由自取而揆諸好生之德必有惻然難安者此又一弊也竊惟周重司寇只列任收漢易肉刑不設流徙梁陳以下有歲刑及髡鉗亦少徒流之制近來東西各國多以禁繫爲懲罪之科工作爲示罰之辟彼誠謂加以拘執足啟悔心責以工傭更裨要務執業足供所食則上無耗費收犯皆有定所則下少逋逃而侵染良民滋長奸慝諸弊更不禁而自止揆之經訓定例尙無刺謬擬請仿漢時輸作之制

飭下各省通設罪犯習藝所以後將命盜雜案遣軍流徒各罪犯審明定擬後卽在犯事地方收所習藝不拘本省外省分別年限之多寡以爲工役之輕重精而鏤刻鎔冶諸工粗而布縷縫織之末皆分別勤惰嚴定課程其愚劣過甚者令作舉重等項苦工徒犯自半年至三年加重至四年軍流自非所犯常赦所不原者似均可酌定年限期滿察看工作分數及有無悛悔有無切保再行釋放流罪自五年至九年軍罪自十年至二十年皆令常帶刑錄在所工作文弱不能工作者卽令服所中書記司帳之役桀驁不服約束則加以鞭扑督責之刑是有十益拘繫本地衆知儆惕一也管束有所不

致逃亡二也見聞不廣習染不深三也各營工役使生善心四也力之所獲足以自給五也與人隔絕不滋擾害六也繫念鄉土易於化導七也護解無庸經費可省八也本籍保釋的確可靠九也卽或疾病死亡仍獲首邱法中有恩十也惟設習藝所雖不無可費然較之原來招審遞解之費外來寄監安置之費所省已多則挹彼注滋固州縣所禱祀以求者也踴躍奉行尤可操券此外尙有鎖帶桿礮人犯平日游行街市多半以攫物訛人爲生活及釋放之後或尋報復或犯別案旣釋重負轉能身輕步快更難追捕且該犯等恃帶有桿礮需索以爲生產久且私行逃避翻得桿礮別售於人滋累無已種種流弊皆爲地方之害擬請此後此項人犯亦併入習藝所內一律辦理懇請飭下政務處會同刑部修律大臣妥議章程行令各省一律遵辦又查片奏內稱光緒二十年刑部續議軍流徒犯脫逃新章有訊明願帶家室地方官量爲咨送及逃犯罪應加等調發枷號鞭責仍發原配者均酌擬監禁年限各辦法竊以爲欲逃之犯必不願帶家室且攜帶婦稚長途跋涉於公款不免多耗於私情尤非所便至部定監禁章程係指已逃就獲者而言現擬入所習藝則防之於未逃之先且授之以謀生之術似較部章尙爲周密溯自九年以來部中因各犯逃亡過衆屢議更張亦足爲法窮當變之證至疏脫軍流徒各犯迭次通行均議有加重處分新定罪名凡此後收所各犯疏脫者地方官及看守兵丁一切處分罪名均請仍照通行辦理俾知儆惕而免疏虞

各等因奏奉 諭旨交臣部核議具奏臣等查刑法之設原爲禁暴戢奸使小民知畏懼而不敢犯所謂辟以止辟也自流徒列爲五刑之正歷代遵行已千餘年立法本極周密至五軍沿自前明雖邊衛裁而名實未符然其初法令森嚴流弊尙少乃近來軍流徒各犯在配不思守法紛紛脫逃是以臣部於光緒十一年間奏令各省督撫就地方情形妥籌安插之法各該省所議或爲籌給口糧或責令學習手藝或給資小貿營生或分別罪犯之老壯強弱妥爲安置或撥給正佐文武衙門充當差役及戍邊捕盜等事當經臣部彙核議如所奏辦理乃奉行不力日久弊生十餘年來仍復逃亡疊疊幾有法窮當變不可終日之勢茲據該護撫奏稱擬請各省通設罪犯習藝所將命盜雜案遣軍流徒各罪犯審明定議後卽在犯事地方收所習藝不拘本省外省分別年限之多寡以爲工役之輕重徒犯自半年至三年加重至四年軍流自非所犯常赦所不原者均可酌定年限流犯自五年至九年軍犯自十年至二十年皆令常帶刑錄在所工作文弱不能工作者卽令服所中書記司帳之役桀驁不服約束者則加以鞭扑督責之刑等語係爲因時制宜起見惟變法原以救弊名實尤不可稍乖犯事各有不同安置豈能歸一致如徒流充役不出本省限滿卽應釋回此項人犯卽在犯事地方收所習藝固屬可行若如所奏軍流人犯亦概不解配竊恐此後不法匪徒有恃無恐益將肆行兇橫無所不爲犯案到官不過收所習藝而已昔則投諸異域今則萃處鄉

關有犯法之名無遷徙之實是立法適以長奸閭閻愈將不靖如謂軍流發配省分儘多優於故土樂於本邦並謂近日輪船火車交通四達一經脫逃追捕不易雖亦有此等情形然不能因此一端遂將情重軍流概行停遣至謂一獄之成並護解各費計之耗於公利歲成鉅款卽爲州縣虧累之大宗在各州縣審解命盜重案由府而司而院所費固屬不少若尋常遞解之犯則自有公費不致累及州縣亦不能惜此區區解囚經費任令法紀蕩然又如所稱鎖帶桿礮人犯平日遊行街市多半以攫物訛人爲生活久且私行逃避翻將桿礮別售於人等語是此項人犯在配尙不思守法豈在籍反能工作耶此遣軍流人犯未可概就犯事地方收所習藝之顯而易見者也片奏又以光緒二十年臣部續議軍流徒犯脫逃新章內說明各犯願帶家室地方官量爲資送一節於公款不免多耗於私情尤非所便不知當日原因陝甘總督奏稱檢查犯冊從未見配所有家而逃者是以臣部特議此權宜辦法且軍流妻妾皆從古法如是欲其有家而安之也故其時軍流到配之後亡者絕少自僉遺例停事歸簡易而逃亡者遂紛紛皆是正可見古法之不可遽廢今旣不能歸復舊例而本犯之情願攜帶家口者由地方官酌量資送情法兩得其便公私並無所損乃該護撫訾論及此特未卽此事之源流詳加考核耳臣等總核該護撫所陳各節用意非不甚美尙待參酌變通方能推行盡利且該護撫所議及者僅在工作一端臣等則謂居今日而欲變通軍流徒辦

法工作之外尚有足資懲勸者曰監禁曰罰贖必三者相輔而行乃能垂諸久遠禁錮以濟工作之窮罰鍰以開自新之路稽諸國家憲典復參以近日東西各國刑制原可並行不悖惟事關交通成例不特圖始尤貴要終且必確有依據庶與妄議更張者不同查工作之罰必以年限多寡分輕重如徒役年限定例昭然毋庸另議軍流人犯應如何酌定工作年限及應否照例發配似以新犯是否常赦所不原爲斷而經理此項工作尤賴得人夫聚羣不逞之徒於一處倘非約束嚴明難保不滋生事端且昔能逃於配所者今豈不能逃於工作此又在各督撫嚴飭所屬認真整頓庶不致日久弊生若監禁之法既足消囚犯桀驁之氣又禁錮之使不能逃臣部從前奏定京城棍徒及天津鍋匪酌加監禁章程行之已久尙無窒礙所有嗣後各省強盜搶奪會匪棍徒等項罪應軍流及軍流由工所脫逃被獲各犯擬仍仿照辦理俾昭懲創至金作罰刑始於上古現在收贖罪之例銀數甚微係專爲老幼廢疾及命婦官員正妻等項有犯從寬准其贖罪者而設至乾隆八年十七年先後奏准官員貢監各平人捐贖免罪之條在內由臣部奏請在外由督撫奏請必斟酌情形實非常赦所不原者方准捐贖查貢監犯答罪贖銀一百兩杖罪贖銀二百兩徒罪贖銀八百兩軍流罪贖銀一千二百兩平人犯答罪贖銀五十兩杖罪贖銀一百兩徒罪贖銀四百八十兩軍流贖銀七百二十兩爲數過鉅虛懸一贖罪之典而呈請贖罪之案往往累歲不獲一見未免有名無

實似應酌減銀數俾貢監及平人偶蹈法網者易於贖罪自新勸懲之方莫善於此以上三端必須釐訂章程方足以資監守臣等公同商議軍流徒各項法制不妨變通規畫總期盡善既據該護撫奏請各省通設罪犯習藝所係屬安插軍流徒第一良法應如所奏辦理擬請嗣後各省徒罪人犯毋庸發配概行收入習藝所按照所犯徒罪年限責令工作限滿釋放如有脫逃被獲從新收所工作遣軍流罪各犯如係強盜搶奪會匪棍徒等項仍照定例發配罪應遣軍者到配加監禁十年罪應擬流者到配加監禁五年其有例內應鎖帶鐵桿石礮人犯既加監禁免其鎖帶桿礮應加枷號者並免其枷號候監禁限滿概行收入習藝所皆令身帶重鐐充當折磨苦工遣軍以二十年爲限流犯以十年爲限限滿分撥各州縣安置聽其各自謀生仍令官按月點卯嚴加管束其非上項致罪而爲常赦所不原者無論軍流亦照定例發配到配一律收所習藝流二千里者限工作六年流二千五百里者限工作八年流三千里者限工作十年軍犯卽照滿流工作年限科斷限滿卽行釋放聽其自謀生計並准其在配所地方入籍爲民若爲常赦所得原者其罪既有減免之時卽其人終有釋回之日無論軍流俱毋庸發配卽在本省收所習藝軍流工作年限亦照前科斷限滿卽行釋放至軍流徒犯如有在所不安工作復行滋事犯法除罪應斬絞監候立決仍照定例問擬及犯該笞杖者各照應得之數折責發落外如徒罪人犯復犯徒罪卽照後犯罪名科斷其軍

流人犯復犯徒罪原犯係強盜等項加監禁五年此外加監禁三年復犯軍流原犯係強盜等項加監禁十年此外加監禁六年限滿果能悔過再行收所分別工作倘怙惡不悛卽令永遠監禁如軍流脫逃被獲按例應加等調發者仍照光緒二十年奏定章程無論脫逃次數軍犯加監禁十年流犯加監禁五年係由配所脫逃者仍發原配監禁原犯得免解配者卽在犯事地方監禁俟限滿查看情形如能悔過再行收所從新分別工作倘收所後仍怙惡不悛卽令永遠監禁至疎脫收所各犯之專管官及看守兵役一切處分罪名擬請照該護撫所擬均照前例辦理至笞杖徒流各犯捐贖之例銀數過鉅擬請酌量變通除罪犯常赦所不原者仍照前不准捐贖及官員贖罪銀數毋庸議減外凡貢監及平人犯罪呈請捐贖者卽照乾隆年間奏定贖罪銀數減半科算仍案笞杖徒流罪名分別等數辦理如貢監犯笞杖定例笞罪罰銀一百兩酌減爲五十兩杖罪贖銀二百兩酌減爲一百兩按笞五等杖五等分作十成以十兩爲一等凡貢監犯笞一十贖銀十兩笞二十贖銀二十兩至杖六十贖銀六十兩以次遞加平人犯笞杖定例笞罪贖銀五十兩酌減爲二十五兩杖罪贖銀一百兩酌減爲五十兩亦照前分作十成以五兩爲一等凡人犯笞一十贖銀五兩笞二十贖銀十兩至杖六十贖銀三十兩以次遞加貢監犯徒罪定例贖銀八百兩酌減爲四百兩按徒五等以二百兩起每一等加五十兩凡貢監犯杖六十徒一年贖銀二百兩杖七十徒一年

半贖銀二百五十兩以犯遞加平人犯徒罪定例贖銀四百八十兩酌減爲二百四十兩按徒五等以一百兩起每一等加三十五兩凡平人犯杖六十徒一年贖銀一百兩杖七十徒一年半贖銀一百三十五兩以次遞加貢監犯軍流定例贖銀一千二百兩酌減爲六百兩按流三等以四百六十兩起每一等加七十兩凡貢監犯流二千里贖銀四百六十兩流二千五百里者贖銀五百三十兩流三千里者贖銀六百兩軍罪卽照滿流銀數捐贖平人犯軍流定例贖銀七百二十兩酌減爲三百六十兩按流三等以二百七十兩起每一等加四十五兩凡平人犯流二千里者贖銀二百七十兩流二千五百里者贖銀三百十五兩流三千里者贖銀三百六十兩軍罪亦照滿流銀數捐贖其緩決減等人犯仍照原議贖罪其一體減半科算此項贖銀暫由各省存儲撥歸習藝所充用作正開銷隨時彙案報部仍令年終彙奏俟各省習藝所出息稱豐足資用度再行規復前制辦理以上軍流徒各犯事犯在未定新章以前已經到配者徒犯扣除役過年月照章補足工作限滿卽行釋放軍流各犯無論新章應否解配卽由配所一律收所習藝工作年限俱照新章科斷限滿分別辦理其事犯在新章以前之笞杖徒流各犯如有呈請贖罪者卽照新章辦理以歸畫一似此酌量變通庶於因時制宜之中仍寓分別差等之意如蒙 俞允臣部卽通各省督撫將軍都統府尹一體遵照至直隸熱河奉天等省向不安插軍流此項罪犯非常赦所不原免其解約之軍流

各犯應否卽在該省收所工作抑或仍照定例發配由該督撫等體查情形迅速奏明辦理所有臣部現審案內軍流各犯應俟該督等具奏到日再按新章核辦再該護撫奏請各省通設此項習藝所似係指一州一縣分設一所而言此等辦法散漫無稽難收實效原奏既稱精而鏤刻鎔冶諸工組而布縷縫線之末分別勤惰嚴定課程是必設立工廠募雇教習購置器具但使規模稍具用費當必不資竊恐各州縣非藉口無款可籌卽相率虛應故事原奏謂州縣禱祀以求踴躍奉行恐亦未必盡然且一州一縣之中向來安置軍流徒犯本屬無多就令州縣實力奉行工作之所雖成而習藝之犯無幾鋪張揚厲款項究屬虛糜且從前各省何嘗不以責令此項罪犯學習手藝爲詞卒至徒託空言有名無實似不如先就省城並該管巡道各設罪犯習藝所一區凡軍流徒犯不必分撥州縣卽在省城及巡道所駐地方收所習藝俾專責成如此則創辦尙不爲難收效自當較易惟各省情形不同未便遙爲懸度應由各該督撫等體查地方情形議定開辦詳細章程妥速奏明辦理再臣部現在纂修則例逐條均須詳細查核如此次所擬章程以後遇有應行酌改之處當隨時具奏請 旨遵行謹奏 光緒二十九年四月初三日奉 旨依議欽此

法部咨各省申明遣軍流犯到配收所習藝定章文

據安徽巡撫恩咨稱據按察司陳啟泰詳前奉刑部通行飭令各省通設罪犯習藝所

等因查安廬道屬一區業經工竣派員開辦所有安廬滁和四府州屬之到配軍流人犯應卽一併解所責令工作覆查奏定章程內載強盜搶奪會匪棍徒等項事犯到配在新章以前者毋庸補行監禁一律收所習藝工作等語卽此以觀凡有到配在新章以前之各項軍流等犯不論到配遲早歷過年月多寡概應收所工作惟查閱原奏章程遣軍流罪各犯如係強盜搶奪會匪棍徒等項到配後分別監禁限滿收入習藝所身帶重鐐充當折磨苦工遣軍以二十年爲限流罪以十年爲限滿日分撥各州縣聽其自謀生計其爲常赦所不原者無論軍流到配後一律收所習藝流二千里限工作六年二千五百里限工作八年流三千里限工作十年軍犯卽照滿流工作年限科斷卽行釋放聽其自謀生計等語其在配已逾工作年限者是否仍應收所按照定限補充工作章程內未經議及第思在配年久罪犯或娶有妻室或小賣營生已與限滿釋放自謀生計者情無二致若再一律收所其常赦所不原之地尙無苦累而強盜搶奪會匪棍徒則須身帶重鐐充當折磨苦工反覺重受拘繫且此項罪犯早經論決今復援照新章罰令工作亦與重科無異惟關係甚鉅未便臆斷所有新章以前到配已逾工作年限各項罪犯應否再行收所從新習藝其未滿工作年限者應否扣除歷過年月按照定限收所習藝抑應如何酌量變通之處自應咨請部示以昭畫一相應咨達等因前來查奏定章程強盜搶奪會匪棍徒等項事犯到配在新章以前者毋庸補行